



Bosnia and Herzegovina
Federation of Bosnia and Herzegovina
CANTON SARAJEVO
Ministry of Justice and Administration

Broj: 03-04-02-3402/21
Sarajevo, 11.05.2021. godine

SKUPŠTINA KANTONA SARAJEVO
gosp. Elvedin Okerić, predsjedavajući Skupštine

PREDMET: Zastupnička inicijativa zastupnika Aljoše Čampara, odgovor, dostavlja se –

VEZA: Vaš akt, br. 01-04-151-56/21 od 01.02.2021. godine

Zastupnik Aljoša Čampara je dana 29.01.2021. godine, u skladu sa članom 106. Poslovnika Skupštine Kantona Sarajevo, pokrenuo zastupničku inicijativu koja obuhvata *"nekoliko nužnih koraka kako bi se za žene žrtve verbalnog i fizičkog seksualnog nasilja stvorilo sigurno okruženje."*

U predmetnoj inicijativi, kao prvi korak predlaže se osnivanje sigurne kancelarije, kao mjesta u kojem će žene žrtve seksualnog nasilja moći potražiti psihološku i pravnu pomoć nakon što budu suočene sa istim. Potrebno je uspostaviti *"fiksnu i mobilnu liniju koje bi kroz različite vidove kampanje bile promovisane, a čiji bi brojevi bili istaknuti i na zvaničnoj web stranici Kantona, te mail adresa i tehnička opremljenost prostora."*

Dalje, u Inicijativi se navodi da je potrebno *"hitno izmijeniti Etički kodeks Univerziteta u Sarajevu"*, s obzirom da ne pruža nikakvu zaštitu studentima. Etički kodeks definiše pojam *"Uznemiravanje" te isto tretira na potpuno bezazlen način*, koji kao takav ostavlja prostor da se obesmisle prijave uznemiravanja. Članovi Etičkog odbora/savjeta su *kolege profesori i djelatnici Univerziteta*, što u potpunosti diskredituje cijelu mogućnost podnošenja prijave protiv nekoga i u startu obeshrabruje. Navodi se da su rokovi *koji su u trajanju od 30 pa sve do 90 dana za očitovanje po nekom pitanju nerazumno veliki*, te se citira član 32. Etičkog kodeksa:

"Odbor ne provjerava navode iz zahtjeva i očitovanja niti ima ovlasti istraživati ih i utvrđivati činjenice po vlastitoj inicijativi. Ako se navodi o činjenicama iz zahtjeva i navodi o činjenicama iz očitovanja razlikuju, a o istinitosti spornih tvrdnji se ne može zaključiti iz materijala koji je



web: <http://mpu.ks.gov.ba>
e-mail: mpu@mpu.ks.gov.ba;
Tel: + 387 (0) 33 562-083,
Fax: + 387 (0) 33 562-241
Sarajevo, Reisa Džemaludina Čauševića 1



podnesen uz iste, odbor će u svom mišljenju tu okolnost navesti te se ograničiti na davanje stajališta o načelnom pitanju".

Naglašeno je da nijedna žrtva ne smije biti primorana da prijavu ovakve vrste nasilja podnosi onog trenutka kada joj se nasilje događa, te da ne smije biti zastare djela u ovom slučaju.

Istaknuto je da je potrebno hitno propisati sankciju koju će povlačiti seksualno fizičko i verbalno napastvovanje studenata, te se od Ministarstva pravde i uprave Kantona Sarajevo traži da "sagleda sveukupnu legislativu vezano za predmetno pitanje", te da predloži "da se u Krivični zakon Federacije propiše krivično djelo seksualnog uznemiravanja ukoliko ga nema, te da se harmoniziraju na nivou cijele države."

Nadalje, od Vlade Kantona Sarajevo se traži da "kroz svoje institucije, posredstvom nadležnih ministarstava, te u saradnji sa međunarodnim partnerima osmisli i provede kampanju koja će se redovno prezentovati ne samo javnosti putem određenih kanala, već koja će na neki način postati sastavni dio sistema obrazovanja. Navodi se da adolescenti još od tog perioda moraju biti svjesni problema, moraju biti ohrabreni da pravoremeno reaguju ukoliko im se desi seksualno uznemiravanje bilo koje vrste, te moraju znati da postoji sistem dostupnih mehanizama koji im može i hoće pružiti zaštitu. Od Vlade Kantona se traži da bude nosilac ovih aktivnosti, a međunarodni partneri koji izraze želju da se uključe su dobro došli.

U vezi sa predmetnom inicijativom, Ministarstvo pravde i uprave ističe da je Rješenjem Vlade Kantona Sarajevo broj: 02-04-1942-3/21 od 26.01.2021. godine, imenovan Ekspertni tim za izradu Protokola o postupanju u slučaju seksualnog uznemiravanja i nasilja u organima uprave, javnim preduzećima, javnim ustanovama i pravnim licima čiji je osnivač Kanton Sarajevo, te da je Protokol o postupanju u slučaju seksualnog i spolno zasnovanog uznemiravanja, kao oblika nasilja u organima uprave, javnim preduzećima, javnim ustanovama i pravnim licima čiji je osnivač Kanton Sarajevo objavljen 06.05.2021. godine u "Službenim novinama Kantona Sarajevo" broj 18/21.

Predmetna inicijativa je razmatrana na drugom sastanku Ekspertnog tima. Usaglašeno je da je tačka 1. Inicijative opravdana, te je u Protokolu propisano uspostavljanje Sigurne kancelarije koja će vršiti ulogu centralnog savjetnika/savjetnice, a kojem se osoba izložena uznemiravanju može obratiti u slučaju da iz nekih razloga ne želi podnijeti prijavu savjetniku iz organa u kojem je zaposlena, odnosno ako organ javnog sektora nema kapacitete da obezbijedi savjetnika u smislu manjeg broja zaposlenih. Centralni savjetnik (Sigurna kancelarija) se uspostavlja u prostoru Zavoda za pružanje besplatne pravne pomoći Kantona Sarajevo.

U vezi sa dijelovima Inicijative u kojim se traži izmjena Etičkog kodeksa Univerziteta u Sarajevu, te predlaganje izmjena i dopuna Krivičnog zakona Federacije Bosne i Hercegovine, ističemo da su navedena pitanja izvan djelokruga Ministarstva pravde i uprave Kantona Sarajevo, imajući u vidu autonomiju Univerziteta u Sarajevu, odnosno, kada je u pitanju Krivični zakon Federacije Bosne i Hercegovine, činjenicu da ovo ministarstvo ne može uticati na donošenje izmjena, odnosno dopuna propisa drugih nivoa vlasti.

Po pitanju dijela Inicijative koja se odnosi na potrebu provođenja kampanje koja će se redovno prezentovati ne samo javnosti putem određenih kanala, već koja će na neki način postati sastavni dio sistema obrazovanja, ističemo da je u Protokolu predviđen poseban dio pod nazivom *Podizanje svijesti*, u kojem su definisani koraci koje Vlada Kantona Sarajevo samostalno i zajedno sa drugim organima javnog sektora poduzima na informisanju, edukaciji i prevenciji seksualnog uznemiravanja. Kao mjere navedeni su informisanje, edukacija, medijska kampanja i akcioni planovi, a za svaku mjeru nabrojane su aktivnosti, nositelji aktivnosti, finansijska sredstva i vrijeme



web: <http://mpu.ks.gov.ba>
e-mail: mpu@mpu.ks.gov.ba
Tel: + 387 (0) 33 562-083,
Fax: + 387 (0) 33 562-241

Sarajevo, Reisa Džemaludina Čauševića 1



realizacije. U svrhu informisanja predviđena je izrada brošura, letaka, promotivnih plakata i online materijala. Propisano je održavanje raznih edukacija (seminara, webinar, online modula), treninga, TOT obuka, te izrada kratkih video uradaka za TV, ciljanih medijskih sadržaja o seksualnom uznemiravanju, promocija na društvenim mrežama i kampanja na otvorenom.

S poštovanjem,

Dostaviti:

1. Naslovu;
2. Stručna služba Vlade Kantona Sarajevo – na znanje;
3. a/a.



web: <http://mpu.ks.gov.ba>
e-mail: mpu@mpu.ks.gov.ba
Tel: + 387 (0) 33 562-083,
Fax: + 387 (0) 33 562-241
Sarajevo, Reisa Džemaludina Čauševića 1

